



Republika e Kosovës
Republika Kosova – Republic of Kosovo

02-060/01-0042000-3/26

24.07.2026



Komuna e Mitrovicës së Jugut
Opština Juzna Mitrovica – Municipality of Mitrovica South

KUVENDI I KOMUNËS SË MITROVICËS SË JUGUT

Nr. 02-060/01-0042000-3/26 dt. 29.07.2026

Mitrovicë

Në mbështetje të nenit 12, 17 pika e), të Ligjit Nr. 03/L-040 për Vetëqeverisjen Lokale, nenit 13, paragrafi 1, nënparagrafi 1.4, të Statutit të Komunës së Mitrovicës së Jugut, si dhe me qëllim të promovimit të mbrojtjes së mjedisit, gjelbërimit urban, estetikës së hapësirave private dhe rritjes së ndërgjegjësimit qytetar për përmirësimin e ambientit jetësor, Kuvendi i Komunës në mbledhjen e rregullt të mbajtur më 29.07.2026, me rekomandim të Komitetit për Politikë dhe Financa (Konkluzioni Nr. 02-060/01-0041998-3/26 dt. 28.07.2026); sjell këtë:

VENDIM

Për organizimin e konkursit komunal dhe ndarjen e çmimeve për kopshtin, ballkonin dhe sipërfaqen më të mirë të rregulluar para lokaleve afariste dhe atyre të gastronomisë

1. MIRATOHET Vendimi për organizimin e konkursit komunal dhe ndarjen e çmimeve për kopshtin, ballkonin dhe sipërfaqen më të mirë të rregulluar para lokaleve afariste dhe atyre të gastronomisë në territorin e Komunës së Mitrovicës së Jugut.
2. Ky konkurs ka për qëllim, promovimin e gjelbërimit dhe estetikës urbane, stimulimin e pjesëmarrjes së qytetarëve në përmirësimin e ambientit jetësor dhe nxitjen e praktikave të qëndrueshme për mirëmbajtjen e oborreve, kopshteve dhe ballkoneve.
3. Në konkurs kanë të drejtë të marrin pjesë personat fizikë që kanë vendbanim në territorin e Komunës së Mitrovicës së Jugut dhe që posedojnë ose shfrytëzojnë ligjërisht oborr, kopsht ose ballkon në territorin e Komunës.
4. Konkursi organizohet në këto kategori:
 - a. Kopshti më i mirë (në pronë private);
 - b. Ballkoni panoramik më i mirë (në pronë private);
 - c. Sipërfaqja më e mirë e rregulluar para lokaleve afariste;
 - d. Sipërfaqja më e mirë e rregulluar para lokaleve të gastronomisë.
5. Vlera e këtij projekti-konkursi në total është 3500.00 € dhe ndahet në këto kategori sipas çmimeve:
 - 5.1 Çmimi për kopshtin më të mirë (oborr të rregulluar në pronë private) në vlerë prej 1,000.00 €;
 - 5.2 Çmimi për ballkonin më të mirë (të rregulluar në pronë private) në vlerë prej 500.00 €;
 - 5.3 Çmimi për sipërfaqen më të mirë të rregulluar para lokaleve afariste në vlerë prej 1,000.00 €;
 - 5.4 Çmimi për sipërfaqen më të mirë të rregulluar para lokaleve të fushës së gastronomisë në vlerë prej 1,000.00 €.
6. Obligohen Kryetari i Komunës dhe Drejtoria për Mbrojtjen e Mjedisit, që brenda 30 (tridhjetë) ditëve nga hyrja në fuqi e këtij Vendimi, të shpallin konkursin publik, i cili duhet të përmbajë:
 - 6.1 Kushtet e pjesëmarrjes;
 - 6.2 Kriteret e vlerësimit;
 - 6.3 Afatin e aplikimit;
 - 6.4 Mënyrën e vlerësimit;

6.5 Procedurën e shpalljes së fituesve.

7. Procedurën e vlerësimit e kryen Komisioni për Vlerësim në përbërje prej 5 anëtarësh, të cilin e emëron Kryetari i Komunës.
8. Pas përfundimit të procedurës së vlerësimit, Kryetari i Komunës miraton listën përfundimtare të fituesve. Çmimet ndahen në një ceremoni publike të organizuar nga Komuna.
9. Mjetet financiare paguhën në pajtim me legjislacionin në fuqi dhe mjetet e planifikuara në buxhetin komunal, nga kategoria subvencione dhe transfere nga Drejtoria për Mbrojtjen e Mjedisit.
10. Vendimi shpallet tridhjetë (30) ditë pas regjistrimit në Zyrën e Protokollit të Ministrisë përgjegjëse për Vetëqeverisje Lokale dhe hyn në fuqi shtatë (7) ditë pas publikimit në gjuhët zyrtare në ueb faqen e Komunës së Mitrovicës së Jugut.

Arsyetim

Komuna e Mitrovicës së Jugut, në kuadër të kompetencave dhe përgjegjësi të saja ligjore, ka për obligim të ndërmarrë masa dhe iniciativa që kontribuojnë në mbrojtjen e mjedisit, përmirësimin e cilësisë së jetesës, zhvillimin e estetikës urbane dhe promovimin e pjesëmarrjes aktive të qytetarëve në ruajtjen dhe përmirësimin e hapësirave të tyre jetësore dhe afariste. Kjo iniciative synon në rend të parë të promovojë kulturën e gjelbërimit, përgjegjësinë qytetare ndaj mjedisit si dhe rregullimin funksional e estetik, për një qytet të pastër mjedisor dhe estetikisht të rregulluar, faktë të cilat janë vlerësuar se organizimi i një konkursi komunal me karakter publik paraqet një instrument të përshtatshëm për stimulimin e qytetarëve dhe subjekteve afariste që, përmes angazhimit të tyre, të kontribuojnë në zbulimin e qytetit dhe përmirësimin e mjedisit jetësor. Përmes ndarjes së çmimeve synohet të vlerësohen dhe të promovohen shembujt më të mirë të mirëmbajtjes së hapësirave private dhe atyre para lokaleve afariste, duke krijuar një frymë pozitive konkurrence dhe duke nxitur pjesëmarrje edhe më të madhe në vitet e ardhshme.

Ky Vendim mbështetet në kompetencat vetanake të komunës të përcaktuara me Ligjin Nr. 03/L-040 për Vetëqeverisjen Lokale, i cili u njeh komunave kompetenca në fushën e mbrojtjes së mjedisit, zhvillimit lokal dhe ofrimit të shërbimeve me interes publik lokal. Gjithashtu, ai mbështetet në Ligjin Nr. 03/L-025 për Mbrojtjen e Mjedisit, i cili obligon institucionet publike të ndërmarrin masa për mbrojtjen dhe përmirësimin e mjedisit, promovimin e zhvillimit të qëndrueshëm dhe ngritjen e vetëdijes publike për çështjet mjedisore. Për më tepër, Statuti i Komunës së Mitrovicës së Jugut i njeh komunës kompetencat për ndërmarrjen e aktiviteteve dhe programeve që synojnë realizimin e interesit publik në nivel lokal. Me qëllim të garantimit të transparencës, trajtimit të barabartë dhe besueshmërisë së procesit, propozohet që konkursi të zhvillohet përmes thirrjes publike, në të cilën do të përcaktohen kushtet e pjesëmarrjes, kriteret e vlerësimit, afatet për aplikim, procedura e shqyrtimit dhe mënyra e shpalljes së fituesve.

Duke marrë parasysh rëndësinë e promovimit të gjelbërimit, mbrojtjes së mjedisit, estetikës urbane dhe pjesëmarrjes aktive të qytetarëve në përmirësimin e ambientit jetësor, konsiderohet se miratimi i këtij vendimi është në interes publik dhe do të ndikojë pozitivisht në përmirësimin e pamjes së qytetit, ngritjen e vetëdijes mjedisore dhe forcimin e bashkëpunimit ndërmjet komunës, qytetarëve dhe komunitetit të biznesit.

Mitrovicë

Dorëzohet:

- 1 x 1 Kryesuesit të Kuvendit
- 1 x 1 MAPL-së
- 1 x 1 Arkivit
- Kopje: Kryetarit të Komunës
- DMM-së

